

17. august 2007  
11. marts 2007

UKA 2007/12  
UPA 2007/50

## **Tusagassiuisarnermi akisussaassuseqarneq pillugu Inatsisartut inatsisissaattut siunnersuut.**

Kalaallit Nunaanni tusagassiuisarnermi akisussaassuseqarneq pillugu, inatsit nr. 439, 31. maj 2000-imeersoq naapertorlugu aaliangersarneqarpoq:

### **Kapitali 1**

#### *Inatsisip atuuffii*

§ 1. Inatsisartut inatsisaat manna tusagassiuutinut ukununnga atuuppoq:

- 1) Nunap iluani atuagassiat naafferartumik saqqummersartut, ilaallutik assilisat saqqummiussallu taakkununnga assingusut, naqiterneqarlutik allatulluunniit amerlisarneqartut.
- 2) Nipi aamma assit atorlugit aallakaatitat, Kalaallit Nunaata Radiuanit (KNR) aamma ingerlatsivinnit allanit, radiumik tv-millu ingerlatsineq pillugu Inatsisartut peqqussutaat naapertorlugu radiumik tv-millu ingerlatsinissamut akuerisaasunit siammarterneqartut imaluunniit agguaanneqartut.
- 3) Allatat aamma assit aammalu nipi atorlugu aallakaatitat, piffissap ilaani tamanut siammarterneqartartut, taakkua nutaarsiassanik ingerlatitseqqiinertut, ingerlatitseqqiinernut nr. 1-imi imaluunniit 2-mi pineqartunut sanilliunneqarsinnaasutut iluseqarpata, taamaattoq takuuk § 8, imm. 1.

### **Kapitali 2**

#### *Nalinginnaasumik aaliangersakkat*

#### *Nunap iluani atuagassiat naafferartumik saqqummersartut*

§ 2. Atuagassiamik naqiterisitsisutut isigineqassaaq, atuagassiap saqqummersinneranik akiliisoq.

*Imm. 2.* Atuagassiaq nunap iluaneersutut isigineqassaaq, naqiterisitsisup ingerlatsinera Kalaallit Nunaanni pippat.

*Imm. 3.* Atuagassiaq naafferartumik saqqummersartutut isigineqassaaq, ikinnerpaamik ukiumut marloriarluni saqqummersussatut aaliangiunneqarsimappat.

§ 3. Atuagassiami nunap iluani naafferartumik saqqummersartumi sumiluunniit ilisimatitsissutigineqarsimassaaq, atuagassiamut pineqartumut kina akisussaassutut

aaqqissuisuunersoq, matuma kingorna taaneqartoq aaqqissuisoq.

*Imm. 2.* Aaqqissuisoq tassaavoq, atuagassiap imarisai pillugit inaarutaasumik aaliangiisinnatitaasoq. Aaqqissuisoq ataasiinnaasinnaavoq.

*Imm. 3.* Aaqqissuisup kinaaneranik amigartumik imaluunniit eqqunngitsumik ilisimatitsineq, naqiterisitsisup aamma aaqqissuisup akisussaaffigaat.

Eqqunngitsumik inuk ilisimatitsissutigineqartoq taannaavortaaq akisussaasoq, inuup pineqartup akuersineratigut ilisimatitsineq pisimappat.

**§ 4.** Aaqqissuisup inuit § 10-mi, § 10, tak. § 9, imm.2 aamma 3-mi aamma § 27, imm. 1-imi pineqartut kikkunerat ilisimatitsissutigissavaa, kimilluunniit inatsisitigut soqutigisaqartumit tamanna pillugu qinnuigineqaruni..

#### *Radio aamma tv*

**§ 5.** KNR aamma ingerlatsiviit allat, radiumik tv-millu ingerlatsineq pillugu Inatsisartut peqqussutaat naapertorlugu radiumik tv-millu ingerlatsinissamut akuersissuteqartut, Kalaallit Nunaanni Tusagassiuutit pillugit Aaliangiisartunut (Tusagassiuutit pillugit Aaliangiisartunut) ilisimatitsissutigissavaat, kina aaqqissuisuunersoq.

*Imm. 2.* Aaqqissuisoq tassaavoq aallakaatitamik imaluunniit ilanngussamik siammarterinissamut inaarutaasumik aaliangiinissamut oqartussaaffiligaasoq. Aaqqissuisoq ataasiinnaasinnaavoq.

*Imm. 3.* Radiumik aamma tv-mik ingerlatsivik sunaluunniit, piumasaqartoqartillugu ilisimatitsissaaq kina aaqqissuisuunersoq.

*Imm. 4.* Aaqqissuisup kinaaneranik amigartumik imaluunniit eqqunngitsumik ilisimatitsinermut akisussaaneq, radiumik imaluunniit tv-mik ingerlatsivimmiippoq aammalu aaqqissuisumiilluni. Eqqunngitsumik inuk ilisimatitsissutigineqartoq taannaavortaaq akisussaasoq, inuup pineqartup akuersineratigut ilisimatitsineq pisimappat.

**§ 6.** Aaqqissuisoq, kimilluunniit inatsisitigut soqutigisaqartumit qinnuigineqaruni, aallakaatitat ilanngussallu ersarissumik nalunaarsukkat ilisarineqaatigisinnaasaannik, kiisalu § 17, imm. 1-mi, § 18, imm. 1-imi, § 20, imm. 1-imi aamma § 27, imm. 1-imi aaliangersakkat malillugit akisussaasut kikkunerannik ilisarititsisinnaasunik paasissutissiissaaq..

**§ 7.** Aaqqissuisup qularnaassavaa, aallakaatitat tamarmik nuutinnerisa illersorneqarsinnaasumik qaammatini pingasuni toqqorsimaneqarnissaat.

*Imm. 2.* Imm. 1-imi piffissaliussaq qaangerneqaraluarpuunniit, aallakaatitat imarisaat pillugit naammagittaalliutigineqartut imaluunniit suliassanngortinneqartut nuutinneri toqqortarineqassapput suliap inaarutaasumik naammassineqarnissaa tikillugu.

#### *Tusagassiuutit allat*

**§ 8.** Tusagassiuutit pillugit aaliangiisartut aaliangissavaat ingerlatsiviit, tusagassiuutinik § 1, nr. 3-mi taaneqartunik saqqummiisartut, sorliit, Inatsisartut inatsisaanni aaliangersakkanut ilaassanersut.

*Imm. 2.* Imm. 1-imi ingerlatsivinnut taaneqartunut §§ 5-7-imi maleruagassat atuupput.

*Imm. 3.* Imm. 1 naapertorlugu Tusagassiuutit pillugit Aaliangiisartut aaliangiineri, taamaallaat ingerlatsivinnut kiffaanngissuseqartumik aaqqissuisoqarnikkut nutaarsiassanik suliarisanik ingerlatitseqqisartunut, tak. § 1, nr. 3, tunggassuteqarput.

### **Kapitali 3**

#### *Tusagassiuutit imarisaannut akisussaaneq*

##### *Atuagassiat naafferartumik nunap iluani saqqummersartut*

**§ 9.** Nunap iluani atuagassiap naafferartumik saqqummersartup imarisaanut taamaallaat akisussaatinneqarsinnaapput atuagassiami allaaserisamik allattoq, aaqqissuisoq aamma naqiterisitsisoq, taamaattoq tak §§ 14, 25 aamma 27.

*Imm. 2.* Allaaserisanut akisussaaneq pillugu maleruagassat aamma atuupput assilisanut saqqummiinernullu taakkununnga assingusunut.

*Imm. 3.* Agguaatkakat, nivinnagassat, takusassiat ilaalu ilanngullugit atuagassiap innersuussamik imaluunniit aallaavigisamik ilaattut isigineqassapput.

**§ 10.** Atuagassiami allaaserisamik atertaqartitamik allattoq, allaaserisap imarisaanut akisussaavoq inatsiseqarnermi malittarisassat nalinginnaasut naapertorlugit.

*Imm. 2.* Allaaserisaq atertaqartinneqartutut isigineqassaaq, allaaserinnittup akuerisaanik, allaaserinnittup aqqani, imaluunniit assinganik assitaqarluni, tamanut saqqummiunneqaruni. Taamatuttaaq ippoq allaaserisaq, allaaserinnittup aterusia imaluunniit ilisarnaataa atorlugu saqqummiunneqarpat, nalinginnaasumillu ilisimaneqarpat, inuup kia ateruseq imaluunniit ilisarnaat pineqartoq atugarineraa..

*Imm. 3.* Allaaserisaq atertaqartinneqartoq inunnik arlalinnik allataappat, takuneqarsinnaananili immikkoortui assigiinngitsut kimit allanneqarsimanersut, allaaserisap imarisaanut tamarmik akisussaassapput, inatsiseqarnermi malittarisassat nalinginnaasut naapertorlugit.

*Imm. 4.* Allaaserisamik atertaqartinneqartumik allaaserinnittoq piginneqatigiiffiuppat, peqatigiiffiuppat, suliffeqarfiuppat imminut pigisoq taakkunungalunniit assingusuuppat, inatsiseqarnermi malittarisassat nalinginnaasut naapertorlugit allaaserisap imarisaanut akisussaassapput pineqartup pisortai imaluunniit suliffeqarfik pineqartoq nammineq.

*Imm. 5.* Nutaarsiassaqaqtitsivik paasissutissiisutut taallugu allaaserisaq saqqummiunneqarpat atertaqartinneqartutut isigineqassanngilaq.

**§ 11.** Atuagassiami allaaserisap atertaqartinneqanngitsup imarisaanut aaqqissuisoq akisussaavoq, aaqqissuisoq inatsisinik unioqqutitsinermut piaarisutut imaluunniit eqqumaniannippallaartutut akisussaatinneqanngikkaluarpalluunniit.

*Imm. 2.* Taamatutaaq atuagassiami allaaserisap atertaqartinneqartup imarisaanut aqqissuisoq akisussaassaaq, akisussaaffik § 10 naapertorlugu allaaserinnittumut tutsinneqarsinnaanngippat, allaaserinnittup Kalaallit Nunaannut attuumassuteqannginnera peqqutigalugu, imaluunniit allaaserinnittoq pinerluttaalititsinermi inatsisit naapertorlugit akisussaaitaanissamut naammaginatsumik naatsorsuutigineqarsinnaanngippat. Tamanna atuuppoq, aqqissuisoq inatsisinik unioqqutitsinermit piaarisutut imaluunniit eqqumanianngippallaartutut akisussaatinneqanngikkaluarpalluunniit.

**§ 12.** Taamatutaaq tusagassiuut alla aqutigalugu allaaserisap imaluunniit oqaaseqaatip atertaqartinneqartumik saqqummiunneqarsimasup imarisaanut, aqqissuisup atuagassiaatigut ingerlateqqinneqartumut, aqqissuisoq akisussaavoq. Tamanna atuuppoq, aqqissuisoq inatsisinik unioqqutitsinermit piaarisutut imaluunniit eqqumanianngippallaartutut akisussaatinneqanngikkaluarpalluunniit. Allaaserinnittoq ingerlatitseqqiinnissamut akuersisimappat, allaaserisap malittarisassat §§ 10 aamma 14-miittut ataannissaaq.

**§ 13.** Atugassiami allaaserisap atertaqartinneqartup imarisaanut aqqissuisoq akisussaaqataavoq, aqqissuisumit ilisimaneqartumik atuagassiami aaliangersimasumik suleqataasumit allataappat, aqqissuisup kaammattuineratigut allatulluunniit aqqissuisup peqataaffigisaanik allanneqarsimappat, imaluunniit aqqissuisup ilisimasimappagu, imarisaa eqqunngitsuusoq imaluunniit angerlarsimaffiup eqqissisimatinneqarnissaanik innarliisunik imaqartoq.

**§ 14.** Kinaluunniit atertaqartinneqartumik oqaaseqaatigisimasani pillugit allaaserisami issuarneqartoq, oqaaseqaatip imarisaanut - inatsiseqarnermi malittarisassat nalinginnaasut naapertorlugit - akisussaaqataavoq, issuagaq eqqortumik issuarneqarsimappat, pineqartullu atertaqartinneqartumik issuarneqarnissani akuersimappagu.

**§ 15.** Naqiterisitsisoq atuagassiap imarisaanut akisussaavoq, §§ 11-13-imi malittarisassat naapertorlugit aqqissuisoq akisussaatinneqarsinnaanngippat, amigartumik imaluunniit eqqunngitsumik aqqissuisoq kinaassusilerneqarpat, imaluunniit aqqissuisup Kalaallit Nunaannut attuumassuteqannginnera imaluunniit naammaginatsumik naatsorsuutigineqarsinnaannginnera pissutaappata. Tamanna atuuppoq, aqqissuisoq inatsisinik unioqqutitsinermit piaarisutut imaluunniit eqqumanianngippallaartutut akisussaatinneqanngikkaluarpalluunniit.

*Imm. 2.* Naqiterisitsisoq ingerlatsiviuppat, naalagaaffiup oqartussaaffigisaanit, Namminersornerullutik Oqartussanit, kommunimit, imal. kommunit ataatsimoorfiannit, Kommunalbestyrelsit nunaqarfinnilu aqutsisut il. il. pillugit Inatsisartut inatsisaata ataaniittumit tamakkiisumik ilaannakortumilluunniit pigineqartoq, piginneqatigiiffiuppat assingusuuppalluunniit, ingerlatsivik imminermini akisussaatinneqassaaq. Tamanna aammattaaq atuuppoq unioqqutitsisoq tassaappat Namminersornerullutik Oqartussat, kommuni imaluunniit kommunit ataatsimoorfiat, Kommunalbestyrelsit nunaqarfinnilu aqutsisut il. il. pillugit Inatsisartut inatsisaata ataanniittoq.

### *Radiukkut tv-kkullu aallakaatitat*

**§ 16.** Radiukkut tv-kkullu aallakaatitat § 1, nr. 2-mi taaneqartut imarisaannut akisussaaffik taamaallaat allatamik allaaserinnittumut, oqaaseqaammik saqqummiisumut, aaqqissuisumut aamma radiumik tv-millu ingerlatsivimmuut tutsinneqarsinnaavoq, taamaattoq tak. § 20, imm. 2, § 25 aamma § 27.

*Imm. 2.* Allatanut aamma oqaaseqaatinut akisussaaneq pillugu malittarisassat aammattaaq filminut, assilisanut assigisaannullu atuupput.

**§ 17.** Allatamik aallakaatinneqartumik allattuusoq, allatap imarisaanut inatsiseqarnermi malittarisassat nalinginnaasut naapertorlugit akisussaavoq, pineqartoq allatap aallakaatinneqarnissaanut akuersisimaguni. Tamannali atuutinngilaq, allattoq neriorsorneqarsimappat kinaassusaa isertuunneqassasoq, taamaattoq tak. § 20, imm. 2.

*Imm. 2.* Imm. 1, pkt. 2.-ni taaneqartutut pisumi, aaqqissuisoq allatap imarisaanut akisussaavoq, aaqqissuisoq inatsisinik unioqqutitsinermut piaarisutut imaluunniit eqqumaniangippallaartutut akisussaatinneqanngikkaluarpalluunniit.

*Imm. 3.* Aallakaatitani toqqaannangitsuni, allatap imarisaanut aaqqissuisoq aamma akisussaavoq, allaaserinnittoq allatap saqqummiunneqarnissaanik akuersisimangippat, imaluunniit allaaserinnittoq akisussaatinneqarsinnaanngippat, kinaassutsiminik eqqunngitsumik ilisimatitsimanera pissutigalugu, Kalaallit Nunaannut attuumassuteqannginnera peqqutigalugu imaluunniit naatsorsuutigineqarsinnaannginnera peqqutigalugu. Tamanna atuuppoq, aaqqissuisoq inatsisinik unioqqutitsinermut piaarisutut imaluunniit eqqumaniangippallaartutut akisussaatinneqanngikkaluarpalluunniit.

**§ 18.** Toqqaannangitsumik aallakaatitami oqaaseqaateqartoq, inatsiseqarnermi malittarisassat nalinginnaasut naapertorlugit oqaaseqaatip imarisaanut akisussaassaaq, akisussaatinneqassanngilarli:

- 1) Aallakaatitami pineqartup kinaassusaa saqqumminngippat,
- 2) Pineqartoq oqaaseqaatip saqqummiunneqarnissaanut akuersisimangippat,
- 3) Pineqartoq peqataanermigut kinaassusersineqarsinnaassanngitsoq neriorsorneqarsimappat, tamannalu qularnaarumallugu naammaginartunik iliuuseqartoqarsimappat.

*Imm. 2.* Imm. 1-mi taaneqartutut pisuni, oqaaseqaatip imarisaanut aaqqissuisoq akisussaavoq, aaqqissuisoq inatsisinik unioqqutitsinermi piaarisutut imaluunniit eqqumaniangippallaartutut akisussaatinneqanngikkaluarpalluunniit. Tamanna aammattaaq atuuppoq oqaaseqaateqartoq akisussaatinneqarsinnaanngippat, kinaassutsiminik eqqunngitsumik ilisimatitsimanera pissutigalugu, Kalaallit Nunaannut attuumassuteqannginnera peqqutigalugu imaluunniit naatsorsuutigineqarsinnaannginnera peqqutigalugu.

**§ 19.** Tusagassiut alla aqqutigalugu allaaserisap imaluunniit oqaaseqaatip atertaqartinneqartumik saqqummiunneqarsimasup imarisaanut, radiukkut tv-kkullu ingerlatsivimmit pineqartumit ingerlateqqinneqartumut, aaqqissuisoq akisussaavoq. Tamanna atuuppoq, aaqqissuisoq inatsisinik unioqqutitsinermi piaarisutut imaluunniit eqqumaniangippallaartutut akisussaatinneqanngikkaluarpalluunniit.

Allaaserinnittoq imaluunniit oqaaseqaateqartoq issuaanissamut akuersisimappat, pineqartoq §§ 17-18-imi aamma 20-mi malittarisassat ataannissaaq. Allaaserisaq, nutaarsiassaqartitsivik paasissutissiisutut taallugu saqqummiunneqartoq, atertaqartinneqartutut isigineqassanngilaq.

**§ 20.** Toqqaannartumik aallakaatitsinermi oqaaseqaateqartoq, inatsiseqarnermi malittarisassat nalinginnaasut naapertorlugit oqaaseqaatip imarisaanut akisussaavoq, kinaassusersineqarsinnaanani peqataanissaminik neriorsorneqarsimanngikkuni, tamannalu qularnaarniarlugu naammaginatunuk iliuuseqartoqarsimappat. Taama pisoqartillugu, oqaaseqaatip imarisaanut aaqqissuisoq akisussaavoq, aaqqissuisoq inatsisinik unioqquutitsinermut piaarisutut imaluunniit eqqumanianngippallaartutut akisussaatinneqanngikkaluarpalluunniit. Taamatuttaaq ippoq, akisussaaffik oqaaseqaateqartumut tutsinneqarsinnaanngippat, taassuma kinaassutsi pillugu eqqunngitsumik paasissutissiisimanera, Kalaallit Nunaannut attuumassuteqannginnera imaluunniit naatsorsuutigineqarsinnaannginnera pissutigalugit.

*Imm. 2.* Tamanut ammasumik ataatsimiinnerniit imaluunniit pisunit allanit soqutiginaatilinniit toqqaannartumik radiukkut tv-kkullu aallakaatitsinerni allatat imaluunniit oqaaseqaatit imarisaannut akisussaaneq inatsiseqarnermi malittarisassat nalinginnaasut naapertorlugit inissinneqassaaq.

**§ 21.** § 17, imm. 1-imi, § 18, imm. 1-imi, aamma § 20, imm. 1-imi eqqaaneqartutut, allatap imaluunniit oqaaseqaatip imarisaanut aaqqissuisoq akisussaaqataavoq ima pisoqartillugu:

- 1) aaqqissuisup ilisimasaanik allakkiarineqarsimappat imaluunniit radiumik tv-millu ingerlatsiviup aaliangersimasumik sulisuanit saqqummiunneqarpat, imaluunniit
- 2) aaqqissuisup kaammattuineragut allaaserisaappat imaluunniit saqqummiussaappat, allatulluunniit aaqqissuisup peqataaffigisaanik saqqummiussaappat, imaluunniit
- 3) aaqqissuisup ilisimasimappagu, imarisaa eqqunngitsuusoq imaluunniit angerlarsimaffiup eqqissisimatinneqarnissaanik innarliisunik imaqartoq, aamma toqqaannartumik aallakaatitsinermi allataq imaluunniit oqaaseqaat saqqummiunniarneqartoq ilisimasimappagu.

*Imm. 2.* Aammattaaq allatap imaluunniit oqaaseqaatip imarisaanut aaqqissuisoq akisussaavoq, § 18, imm. 1, aamma § 20, imm. 1 naapertorlugit, kinaassusersineqannginnissamik neriorsuuteqartoqaraluartoq, tamanna qularnaarumallugu naammaginatunuk iliuuseqartoqarsiman-ngippat. Tamanna atuuppoq, aaqqissuisoq inatsisinik unioqquutitsinermut piaarisutut imaluunniit eqqumanianngippallaartutut akisussaatinneqanngikkaluarpalluunniit.

**§ 22.** Atuaasoq allatulluunniit allatamik imaluunniit oqaaseqaammik ingerlatitseqqiisooq, allatap oqaaseqaatilluunniip imarisaanut akisussaannngilaq.

**§ 23.** Allatap imaluunniit oqaaseqaatip imarisaanut radiumik imaluunniit tv-mik ingerlatsivik imminnermini akisussaassaaq, aaqqissuisup amigartumik eqqunngitsumilluunniit ilisimatitsissutigineqarnera imaluunniit aaqqissuisup Kalaallit Nunaannut attuumassuteqannginnera imaluunniit naatsorsuutigineqarsinnaannginnera pissutigalugit aaqqissuisoq akisussaatinneqarsinnaanngippat. Tamanna atuuppoq, radiumik imaluunniit tv-mik

ingerlatsivik inatsisinik unioqqutitsinermut piaarisutut imaluunniit eqqumanianggippallaartutut akisussaatinneqanngikkaluarpalluunniit.  
*Imm. 2.* Radiumik tv-millu ingerlatsivik ingerlatsiviuppat, naalagaaffiup oqartussaaffigisaanit, Namminersornerullutik Oqartussanit, kommunimit, imal. kommunit ataatsimoorfiannit, Kommunalbestyrelsit nunaqarfinnilu aqutsisut il. il. pillugit Inatsisartut inatsisaata ataaniittumit tamakkiisumik ilaannakortumilluunniit pigineqartoq, piginneqatigiiffiuppat assingusuuppalluunniit, ingerlatsivik imminnermini akisussaatinneqassaaq. Tamanna aammattaaq atuuppoq unioqqutitsisoq tassaappat Namminersornerullutik Oqartussat, kommuni imaluunniit kommunit ataatsimoorfiat, Kommunalbestyrelsit nunaqarfinnilu aqutsisut il. il. pillugit Inatsisartut inatsisaata ataanniittoq.

#### *Tusagassiutit allat*

**§ 24.** Tusagassiutit § 1, nr- 3-mi taaneqartut imarisaannut akisussaaffik, §§ 9-15-imi imaluunniit §§ 16-23-imi malittarisassat naapertorlugit inissinneqassaaq, tusagassiutip qanoq ittuunera apeqqutaatillugu.

#### *Ataatsimut aaliangersakkat*

**§ 25.** Tusagassiutip imarisi aqutugalugit pinerluttaalisitsinermini inatsimmi §§ 11-mik, 12-imi, 13, imm. 1-imi, 14, imm. 1-imi, 15, imm. 1-imi, 34-mik, 39-mik, 40-mik, 40a-mik, 51-imi, 53-imi, 57, imm. 1-imi, 61-imi aamma 64-imi unioqqutitsisoqartillugu inatsiseqarnermi akisussaaneq pillugu nalinginnaasumik malittarisassat atorineqassapput.

**§ 26.** Tusagassiuteqarnermik ingerlatsiviup akiligassiissutit suliamullu aningaasartuutit §§ 9-25-mi malittarisassat naapertorlugit pineqaatissiissutigineqartut toqqaannartumik akiligassarilissavai.

*Imm. 2.* §§ 9-miit 25-mut maleruaqqusat naapertorlugit eqqartuussiviup akiligassiissutinik annertussusiliinermini, pingaartumik isiginiassavaa unioqqutitsinerup qanoq ittuunera aammalu qanoq sakkortutiginera, tusagassiiviup pineqartup qanoq siammartigisarnera, kiisalu unioqqutitsineq pissutigalugu tusagassiiviup iluanaarutigisaasa imaluunniit iluanaarutigisinnaasaasa annertussusaat.

**§ 27.** Takoqqusaarummik ilangussisoq, taassuma imarisaanut akisussaavoq, inatsiseqarnermi malittarisassat nalinginnaasut naapertorlugit. Tamanna aammattaaq ikiuuttuusimasumut atuuppoq.

*Imm. 2.* Takoqqusaarutit imarisaannut, inatsiseqarnermi nalinginnaasumik malittarisassat naapertorlugit, aqqissuisoq akisussaaqataavoq. §§ 4 aamma 6 naapertorlugit aqqissuisup ilisimatitsinissamik pisussaaffini naammassinngikkunigit, aqqissuisoq takoqqusaarutit imarisaanut akisussaatinneqassaaq, aqqissuisoq inatsisinik unioqqutitsinermut piaarisutut imaluunniit eqqumanianggippallaartutut akisussaatinneqanngikkaluarpalluunniit.

§ 28. Naalagaaffiup unnerluussisuunerata aaliangissavaa, tusagassiuutip – Inatsisartut inatsisaanni matumani pineqartup - imarisai pillugit pisortaniit unnerluussisoqassanersoq.

#### **Kapitali 4**

##### *Tusagassiuutit imarisaannut tunngatillugu taarsiisussaatitaaneq*

##### *Nunap iluani atuagassiat naafferartumik saqqummersartut*

§ 29. Atuagassiat naafferartumik nunap iluani saqqummersartut imarisaannut tunngatillugu taarsiinissamut akisussaaffik §§ 9-15-imi aamma §§ 25 aamma 27-mi malittarisassat naapertorlugit akisussaatinneqarsinnaasuniippoq.

§ 30. Atuagassiamik naafferartumik nunap iluani saqqummersartumik saqqummersitsisoq § 29 naapertorlugu taarsiinissamik pineqaatissiissutaasunut suliallu ingerlannerani aningaasartuutinik matussusiinissamut toqqaannartumik akisussaatinneqassaaq.

##### *Radiukkut tv-kkullu aallakaatitat*

§ 31. Radiukkut tv-kkullu aallakaatitat § 1, imm. 1, nr. 2-mi eqqaaneqartut imarisaannut tunngatillugu taarsiinissamut akisussaaffik §§ 16-25-mi aamma 27-mi malittarisassat naapertorlugit akisussaatinneqarsinnaasuniippoq.

§ 32. KNR aamma ingerlatsiviit, radio aamma tv-mik ingerlatsineq pillugu Inatsisartut peqqussutaat naapertorlugu radiumik imaluunniit tv-mik ingerlatsisinnaatitaasut, § 31 naapertorlugu pineqaatissiinikkut taarsiinissamut suliallu ingerlanneqarnerani aningaasartuutit akilernissaannut toqqaannartumik akisussaapput.

*Imm. 2.* Akisussaataaernerulli iluaniinngillat tamanut ammasumik ataatsimiinnerniit imaluunniit pisunit allanit soqutiginaatilinnit toqqaannartumik aallakaatitsinerniit innarliisoqarneranut atasumik taarsiisussaanerit, innarliineq ingerlatsiviup, suliffeqarfup peqatigiiffiulluunniit sulisuanit sulinerup nalaani piliarineqanngippat.

##### *Tusagassiuutit allat*

§ 33. Tusagassiuutit § 1, nr. 3-mi eqqaaneqartut imarisaannut siammaanneqarnerinullu tunngatillugu taarsiinissamut akisussaaffik §§ 29-32-mi malittarisassat naapertorlugit inissinneqassaaq.



## **Kapitali 5**

### *Tusagassiornermi ileqqorissaarneq*

**§ 34.** Tusagassiuutit imarisaat pissusilersuutaallu tusagassiornermi ileqqorissaarnertut isigineqartunut naapertuuttuussapput.

*Imm. 2.* Imm. 1-imik unioqqutitsinerit pillugit naammagittaalliutit tusagassiorfimmu pineqartumut imaluunniit Tusagassiuutit pillugit Aaliangiisartunut toqqaannartumik saaffiginnissutigineqarsinnaapput, taamaattorli tak. imm. 3. Pisuni tamani naammagittaalliornissamat piffissaritinneqarput saqqummiussisoqarneraniit sapaatip-akunneri sisamat. Tusagassiuutip aaliangiinera naammagittaallortumut anngunneraniit sapaatip-akunneri sisamat qaangiutsinnagit Tusagassiuutit pillugit Aaliangiisartunut ingerlateqqinneqarsinnaavoq.

*Imm. 3.* Imm. 1-imik KNR-ip unioqqutitsinera pillugu naammagittaalliutit, saqqummiussisoqarneraniit kingusinnerpaamik sapaatip-akunneri sisamat qaangiunneranni KNR-imut tunniunneqarsimassapput. KNR-ip aaliangiinera naammagittaallortumut anngunneraniit sapaatip-akunneri sisamat qaangiutsinnagit Tusagassiuutit pillugit Aaliangiisartunut ingerlateqqinneqarsinnaavoq.

**§ 35.** Radiumi tv-milu pilerisaarutit imarisaat aammalu pilerisaarutit ilanngussat imarisaat pillugit naammagittaalliutit suliarineqassapput, radio aamma tv pillugit Inatsisartut peqqussutaanni malittarisassat naapertorlugit.

## **Kapitali 6**

### *Akissuteqarsinnaaneq*

**§ 36.** Paasissutissat tigussat, aningaasaqarnikkut annaasaqartitsisinnaasut allatulluunniit pingaaruteqartutigit ajoqusiisinnaasut tusagassiuutikkullu saqqummiunneqarsimasut pillugit tusagassiuutitigit akissuteqarumalluni qinnuteqaatit maleruarneqassapput, paasissutissiissutaasimasut eqqortuunerat qularnanngilluinnartuunngikkaangat.

*Imm. 2.* Akissuteqarnissamik qinnuteqarsinnaavoq, paasissutissani pineqartoq, imaluunniit taanna toqukku qimagussimappat ilaqutaasut qaninnerit.

*Imm. 3.* Akissuteqarnissamik qinnuteqaat allaganngorlugu aaqqissuisumut nassiunneqassaaq, paasissutissat tigussat pineqartut akissuteqarfigiumasat saqqummiunneqarneranniit sapaatip- akunneri sisamat qaangiutsinnagit.

*Imm. 4.* Radiukku aamma tv-kkut pilerisaarutit imarisaat pillugit akissuteqarumanerme malittarisassat radiumik tv-millu ingerlatsineq pillugu Inatsisartut peqqussutaanniittut atuupput.

**§ 37.** Akissuteqarnerup tamanut saqqummiunneqarnissaanut pisussaaffik aaqqissuisumiippoq.

**§ 38.** Akissuteqarnerup imarisaa pingaarnerusutigit paasissutissanut piviusunut pisariaqartunullu, killilerneqassaaq aammalu imarisaa inatsisinut akerliussanngilaq.

*Imm. 2.* Tusagassiuumit pineqartumit piumasarineqarsinnaavoq, akissuteqarnissamik qinnuteqartup akissutissaq nammineerluni ilusilersussagaa.

**§ 39.** Akissuteqarnissaq aningaasartuutitaqanngitsumik pisariaqanngitsumillu kinguarsaanertaqanngitsumik saqqummiunneqassaaq pissusiusut eqqarsaatigalugit naammaginartumik piumasarineqarsinnaasumik ersarissuseqartumik.  
*Imm. 2.* Aaqqissuisoqarnikkut oqaasertaliussat toqqaanartumik saqqummiussinermut tunngasut, paasissutissanut tigussanut killilerneqassapput.

**§ 40.** Akissuteqarnissamik qinnuteqaammut itigartitsineq erngertumik akissuteqarnissamik qinnuteqartumut allakkatigut nalunaarutigineqassaaq, ilanngullugulu ilisimatitsissutigineqassaaq itigartitsineq Tusagassiuutit pillugit Aaliangiisartunut ingerlateqqinneqarsinnaasoq, itigartitsissutip saqqummiunneraniit sapaatip-akunneri sisamat qaangiutsinnagit. Tusagassiuutit pillugit Aaliangiisartut najugaqarfiat ilutigisaanik paasissutissiisutigineqassaaq.  
*Imm. 2.* Ilaanakortumik akissuteqartinneqarneq pillugu naammagittaalliuut, akissuteqartinneqarnerup saqqummiunneqarneraniit sapaatip-akunneri sisamat qaangiutsinnagit Tusagassiuutit pillugit Aaliangiisartunut apuunneqarsimassaaq.

## **Kapitali 7**

### *Kalaallit Nunaanni Tusagassiuutit pillugit Aaliangiisartut*

**§ 41.** Naalackersuisut Kalaallit Nunaanni Tusagassiuutit pillugit Aaliangiisartunik toqqaassapput, taakkualu inuttarissavaat siulittaasoq aammalu ilaasortat arfinillit allat. Naalackersuisut siulittaasoq toqqassavaat. Ilaasortat marluk Kalaallit Nunaanni Tusagassiuutit Peqatigiiffianniit oqaaseqaat aallaavigalugu toqqarneqassapput, aamma ilaasortat marluk toqqarneqassapput, Kalaallit Nunaanni tusagassiuutit naqitat aamma radio tv-lu oqaaseqaateqartereergit aaqqissuisoqarfiisa sinniisuisut. Kiisalu ilaasortat marluk pisortat aallartitaasut toqqarneqassapput, soqutigisaqatigiit kulturikkut sunngiffimmilu ingerlatsineq pillugu Inatsisartut peqqussutaanni kapitali 8 naapertorlugu tapiiffigineqarsinnaasut oqaaseqaataat aallaavigalugu.  
*Imm. 2.* Ilaasortat taakkunungalugu sinniisussat qulaani allassimasutuulli toqqarneqartussat, ukiuni sisamani atuuttussat toqqarneqartassapput. Toqqagaaqqittoqarsinnaavoq.

**§ 42.** Tusagassiuutit pillugit Aaliangiisartut sulianik ingerlatsineranni siulittaasup peqataanerata saniatigut ilaasortat allat pingasut peqataassapput, taakkunungalugu ilaassapput Kalaallit Nunaanni Tusagassiuutit Peqatigiiffiata oqaaseqaataa aallaavigalugu toqqagaq ataaseq, aammalu aaqqissuisoqarfiit siuttoqarfiisa sinniisussaatus toqqagaq ataaseq, kiisalu pisortat aallartitaattut toqqagaq ataaseq.

**§ 43.** Tusagassiuutit pillugit Aaliangiisartut suliani makkunani aaliangiisarput:  
1) Tusagassiornermi ileqqorissaarnissamik maligassiissutit unioqqutillugit saqqummiisoqarsimanersoq, tak. § 34  
2) Kapitali 6-imi malittarisassat naapertorlugit tusagassiuut pisussaanersoq, akerliliineq saqqummiutissallugu, tassunga ilanngullugit akerliliinerup imarisaanut, ilusaanut inissisimaneranullu tunngasut.  
*Imm. 2.* Tusagassiuutit pillugit Aaliangiisartut siulittaasuata itigartissinnaavai:

- 1) Naammagittaalliutit, aalangiisartut susassa qarfigisaannut ersarissumik ilaangitsut, tak. imm. 1, imaluunniit ersarissumik tunngavissaqanngitsut.
- 2) Inunnit, suliffeqarfinit il. il. naammagittaalliutit, pissutsit naammagittaalliutigineqartut pillugit inatsisitigut soqutisaqartuunngitsuneersut.  
*Imm. 3.* Tusagassiuutit pillugit Aaliangiisartut siulittaasuata suliat itigartissavai, § 34, imm. 2-mi imaluunniit 3-mi, imaluunniit § 40-mi naammagittaalliornissamut piffissaliussat eqqortinneqanngippata.

**§ 44.** Tusagassiuutit pillugit Aaliangiisartunut naammagittaalliutit allaganngorlugit apuunneqassapput.

*Imm. 2.* Tusagassiuutit pillugit Aaliangiisartut namminneerlutik suliaq qaqissinnaavaat, taanna pingaaruteqarpat imaluunniit tunngaviusumik pingaaruteqarpat. Taamaattoqartillugu innarlerneqartumit oqaaseqaammik piniartoqassaaq. Innarlerneqartup aqqa taamaallaat taaneqassaaq, tamatumunnga akuersissummik peqarpat.

**§ 45.** Tusagassiuutit pillugit Aaliangiisartut tusagassiummit naammagittaalliummi pineqartumit oqaaseqaammik piniassapput, suliallu ingerlanerani paasissutissanik tapertaasussanik illuatungeriinnit piniarsinnaallutik.

*Imm. 2.* Tusagassiuutit pillugit Aaliangiisartut aammattaaq atuagassiamik pineqartumik piniarsinnaapput, imaluunniit radiukkut tv-kkulluunniit aallakaatitap naammagittaalliornermut aallaaviusup nuutinneqarneranik piumasinnaallutik.

**§ 46.** Suliat Tusagassiuutit pillugit Aaliangiisartunut apuunneqarsimasut, sapinngisamik piaartumik suliarineqassapput.

*Imm. 2.* Tusagassiuutip, Tusagassiuutit pillugit Aaliangiisartut saaffiginnissutaata tighuneraniit ullut arfineq-marluk qaangiutinngitsut, Tusagassiuutit pillugit Aaliangiisartunut oqaaseqatigiumasani nassiussimangipagit, Tusagassiuutit pillugit Aaliangiisartut tunngavigisassatut pigineqartut aallavigalugit suliaq suliarisinnaavaat.

*Imm. 3.* Tusagassiuutit pillugit Aaliangiisartut illuatungeriit oqaatsit atorlugit isumaqatiginninniarnissamut aggersarsinnaavai. Naammagittaalliortoq peqquteqarani isumaqatigiinniarnermut takkutinnippat, Tusagassiuutit pillugit Aaliangiisartut suliaq ingerlateqqissinnaavaat tunngavissatut pigineqareersut aallaavigalugit imaluunniit suliaq tunuartissinnaallugu. Tusagassiuut naammagittaalliutaasoq takkutinnippat, tunngavissatut pigineqareersut aallaavigalugit suliaq ingerlateqqinneqassaaq.

**§ 47.** Tusagassiuutit pillugit Aaliangiisartuni ilaasortaq naammagittaalliutip suliarineranut akuusinnaangilaq tusagassiummut pineqartumut attuumassuteqaruni, imaluunniit allatigut pissutsit imaappata, ilaasortap suliamut immikkut soqutigisaqartuunnginnera apeqquuserneqarsinnaalluni.

**§ 48.** Tusagassiuutit pillugit Aaliangiisartut aaliangiissapput amerlanerussuteqarnikkut patsitalersukkamik aaliangiinertut ilusilerlugu, illuatungeriit akornanni isumaqatigiissuteqarnikkut inaarisoqanngippat. Taasinermi naligiittoqartillugu, siulittaasup taasiner aaliangiisuussaaq.

Isumaqatigiinnigissutaasoq aaliangiinermut tamanit isumaqatigiiffiunngitsumut ilanngunneqassaaq.

**§ 49.** Tusagassiuutit pillugit Aaliangiisartut tusagassiuutip naammagittaalliutigineqartup aqqissuisua peqqusinnaavaat aaliangiineq piaarnerpaamik saqqummiuteqqullugu, Tusagassiuutit pillugit Aaliangiisartut ersarinnerusumik aaliangersagaattut annertussusilerlugu. Tusagassiuutit pillugit Aaliangiisartut aaliangernerata saqqummiunneqarnerani, oqaasertaliussanik ilaqartinneqassanngilaq, nammaginartumillu piumasarineqarsinnaasumik ersarissuseqassalluni.

**§ 50.** Tusagassiuutit pillugit Aaliangiisartut aaliangiineri, allaffissornikkut oqartussanut allanut ingerlateqqinneqarsinnaanngillat.

**§ 51.** Tusagassiuutit pillugit Aaliangiisartut suliatik pillugit, Naalackersuisunut ukiumoortumik nalunaarusiortassapput. Nalunaarut avammut saqqummiunneqassaaq.

**§ 52.** Tusagassiuutit pillugit Aaliangiisartunik isumaqatiginninniarneq aallaavigalugu, Tusagassiuutit pillugit Aaliangiisartut suleriaasissaannik Naalackersuisut aaliangersaassapput.

*Imm. 2.* Tusagassiuutit pillugit Aaliangiisartut allattoqarfimmit ikorfartorneqassapput.

*Imm. 3.* Naalackersuisut aaliangersinnaavaat, Tusagassiuutit pillugit Aaliangiisartut sulinerannut atasumik aningaasartuutit, ilanngullugit allattoqarfeqarnermut aningaasartuutit, tusagassiuutit akornanni agguakkamik matussuserneqassasut, Tusagassiuutit pillugit Aaliangiisartut suleriaasissaanni aagguaassinissamik aaliangersaanerit naapertorlugit.

## **Kapitali 8**

### *Kinguneqartitsinerit*

**§ 53.** § 3, imm. 1-imik, tak. imm. 3, § 4-mik, § 5, imm. 1-imik, tak. imm. 4, § 5, imm. 3-mik, §§ 6-imik, 7-imik aamma 8, imm. 2-mik unioqutitsisoq akiligassinneqassaaq.

*Imm. 2.* §§ 49 aamma 54 naapertorlugit saqqummiussinissamik peqqusinermik eqqortitsinngitsoq akiligassinneqassaaq.

*Imm. 3.* Unioqutitsisoq ingerlatsiviuppat tamakkiisumik ilaannakortumilluunniit naalagaaffiup oqartussaaffigisaanit, Namminersornerullutik Oqartussanit kommunimilluunniit pigineqartoq, imaluunniit kommunit ataatsimoorfigippassuk, Kommunalbestyrelsit, nunaqarfinni aqutsisut il. il. pillugit Inatsisartut inatsisaata ataaniittoq, piginneqatigiiffiuppat, peqatigiiffiuppat assingusuuppalluunniit, suliffeqarfik il. il. pinerluttaalititsinerimi inatsisit naapertorlugit akisussaatinneqarsinnaavoq. Taamatuttaaq ippoq unioqutitsisoq tassaappat Kalaallit Nunaanni Namminersornerullutik Oqartussat, kommuni kommunilluunniit

ataatsimoorfiat, Kommunalbestyrelsit nunaqarfinni aqutsisut il. il. pillugit Inatsisartut inatsisaata ataaniittoq.

**§ 54.** Tusagassiuutip imarisai pissutigalugit kinguneqartitsinermut atatillugu eqqartuussivik aaliangersinnaavoq, eqqartuussinerup imarisai piaarnerpaamik, eqqartuussiviullu aaliangiinera naapertorlugu annertussusilikkamik, tusagassiuutikkut sammiunneqassasut. Saqqummiunneqarnissaanut akisussaaffik aaqqissuisumiippoq.

*Imm. 2.* Saqqummiunneqarnera akeqassanngilaq, nammaginartumillu piumasarineqarsinnaasumik ersarissuseqassalluni.

## **Kapitali 9**

### *Atuutilerfia il. il.*

**§ 55.** Inatsisartut inatsisaat 1. juli 2007 atuutilissaaq. Ilutigalugu Tusagassiuisarnermi akisussaassuseqarneq pillugu inatsit, atuutilersitsineq nr. 39, 20. januar 1997-imeersoq atorunnaarsinneqassaaq. Kalaallit Nunaanni Tusagassiuutit pillugit Aaliangiisartut, maleruaqqusami oqaaseqatigiit aappaat naapertorlugu toqqarneqartut, Tusagassiuutit pillugit Aaliangiisartut nutaat toqqarneqarnissaasa tungaannut atuutissapput.

**§ 56.** Naammagittaalliutit Tusagassiuutit pillugit Aaliangiisartunut § 55-imi taaneqartunut, 1. juli 2007 sioqqullugu apuunneqarsimasut, naammassineqassapput Tusagassiuutit pillugit Aaliangiisartunit Inatsisartut inatsisaat una naapertorlugu toqqarneqarsimasunit, maleruagassani § 55, imm. 1, oqaaseqatigiit 2 naapertorlugu.

*Kalaallit Nunaanni Namminersornerullutik Oqartussat, ulloq xx .xx 2007*

Hans Enoksen

/

Tommy Marq